

[Augsburg], 21. März 1561

An Johannes Oporinus

UB Basel Fr. Gr. I 11, fol. 242r.
Steinmann Nr. 732.

S. P. D. Misi per Erhardum Bibliopolam nostratem, qui Willeri famulus fuit, 2. Epicteti tomum, qui Simplicij commentarios continet. Quem an acceperis, aut per hunc, aut alium tabellarium mihi signifies velim. In Arriano strenuè corrigo, cuius 2. librum iam descriptum ad te misissem, si relegendi spatium fuisset. Neque enim fido τῷ ὑπογράμματεῖ. Sum et vltra semissem 3. libri progressus. Nisi valetudo quae quidem dubia est, aut alias casus me impedierit, Arrianum totum ante pascha absoluero, et Basileam cum primo tabellario ad te mittam. Sin humanitus aliquid mihi interea acciderit, pro mea interpretatione Scheggianam substituas licebit, etsi ego me accuratius expendisse pleraque existimo. De editione quid sit sperandum, scire cupio. Vale et propicio Mercurio πολύχρυσος domum reuertere. 21 Martij 1561.

Hiero[nymus] Wolfius T[uus].